

22-M-2011. UNHA DATA PARA RECORDAR

Unha data. A simple vista soamente semella unha data máis. Pero non é así, ás veces as cousas non son o que parecen. Onte foi un día que recordaremos durante moito tempo (e algún máis que outros...) nas nosas cabezas. Foi o día en que **832 persoas** dixeron que están fartas, que non queren seguir vivindo así. Foi o día en que 832 persoas decidiron, exercendo o seu voto en Redondela, transmitir, comunicar e **GRITAR** ben alto, que **non están dispostas a seguir cos brazos cruzados**. Que están **dispostas a LOITAR**, que queren cambiar as cousas. Que non queren seguir participando deste panorama político actual que temos no concello. E o máis importante; que confiaron na Agrupación de Electores de Redondela para que esta sexa a súa voz dentro do Concello. Que confiaron en nós para que poidamos representalos e loitar para poder cambiar as cousas. Así que queremos dar as grazas a toda esta xente que depositou a súa confianza en nós mediante o seu voto. Dicirlles que imos loitar, que imos actuar. Que somos moitísima xente que non estamos contentos, que estamos indignados e que **agora imos actuar**. Paso a paso, chanzo a chanzo e gota a gota.

Tamén somos conscientes de que a máis de un non lle fixo moita graza esta "sorpresa" electoral. Pero queremos transmitir a toda a xente que **imos traballar duro, que imos estar unidos e que non temos medo**. Que queremos cambiar as cousas. Que imos ser *esixentes* con todo o que está o noso arredor, **comezando por nós mesmos**. Temos a ilusión de saber que temos a unha persoa dentro do Concello representando aos valores éticos e morais da Agrupación. Queremos transparencia, queremos ter palabra, queremos que se nos escoite, cremos en que hai máis formas de escoitar o malestar da cidadanía. Agora sabemos que é **un camiño moi longo** o que nos queda por diante. Que aínda non comezou nada. Que neste panorama político intentarán que caíamos ao chan. Sabemos que haberá máis dunha pedra no camiño, e algunha patada tamén. Pero unha cousa está máis que clara. Poderemos meter a pata, pero nunca a man. Que **se tropezamos ou caemos levantáronos para seguir loitando** polas nosas ideas e os nosos dereitos. Que temos unha virtude que ás veces o traxe non deixa recordala. Somos xente humilde, xoven de espírito e con ganas de cambiar as cousas ou polo menos de intentalo. Poderán criticarnos polos motivos que a xente queira. Pero unha cousa esta clara. Temos ganas de cambiar as cousas, temos a responsabilidade de querer que se vos escoite, de que aínda que non nos fagan caso gritaremos por vós, día si e día tamén.

Grazas outra vez a toda a xente que mediante o seu voto confiou en AER e dicirvos a todos que loitaremos, traballaremos e intentaremos o que todos queremos. Que se nos escoite dentro e non fóra para que miren cara outro lado. Para ter palabra. Para ter a palabra da ASAMBLEA. O proxecto está en marcha e ninguén poderá paralo, porque todos queremos cambiar algo, **porque loitaremos xuntos e porque o 22 de Maio de 2011 case mil persoas en Redondela estouparon co seu voto e dixeron que é o momento. Que soamente temos que crer en nós, que as cousas pódense cambiar, aínda que moita xente necesita ver para poder crer. Hai que estar concienciados, pensar que xuntos somos máis e máis fortes.**

GRAZAS A TODOS OS QUE EXPRESARON O SEU MALESTAR O 22 DE MAIO A TRAVÉS DE NÓS.

AUPA E FORZA AER!